

Judul lontar : Geguritan Basur
Nomor kode : IVD/Krop.20/L.028/DJ
Ukuran lontar :
- Panjang = 55 cm
- Lebar = 3,5 cm
- Margin kiri = 2,5 cm
- Margin kanan = 2,5 cm
- Jarak lubang tengah ke lubang kiri = 21 cm
- Jarak lubang tengah ke lubang kanan = 25 cm
- Panjang tulisan kiri = 20 cm
- Panjang tulisan kanan = 24 cm

Jumlah lembaran lontar : 12 lembar
Asal lontar : Bongkasa Mengwi
Tempat Penyalinan : Yayasan Dwijendra Denpasar
Tahun Penulisan/Penyalinan : Saniscara Paing, Tanggal 22 Mei
1986
Nama Penulis/Penyalin : -
Deskripsi : Lontar ini menceritakan tentang perjalanan mistis tokoh (Basur) yang mengalami pertentangan ilmu antara ilmu hitam dan putih.
Tempat Penyimpanan : Perpustakaan Yayasan Dwijendra Denpasar

Gaguritan bhasur

Puh Ginada

1. Pukulun hyang kawî śwarā,
miwah sang hyang sarāswatī,
tabe tityang ngawe gita,
wong abian kewut mangutus,
minta gita tatangisan,
dewa aji,
lasia tityang tan cantula.
2. Kocap I Nyoman Karang,
magénah di banjar Sari,
wentén pianaknyane dadua,
nanging padha éluh-éluh,
ne kélihan adaninnya,
Ni Śokaṣṭi,
ne cériquean Ni Rijaṣā.
3. Rāga lanjar sada nyandat,
kényung manis mangedanin,
tulia kadi Nilottama,
sing solah manudut kayun,
mararama lintang eman,
katah muji,
dharmma alus dana ghoya.
4. Manyama kalintang tréṣṇa,
twara taen drénggi cinging,
raramannya lintang eman,
bisa mangulanin guru,
I Nyoman Karang ngastawa,
ngajap sai,
pianakke daduā nggon dewa.
5. I Nyoman Karang angucap,
dewa sang hyang ayu kālih,
éda pati lunga éjoh ,
tityang jumah dadi ibuk,
i dewa tuara énot tityang,
alin-alin,
kudyang tityang magarapan.
6. Ingét tityang nene suba,
kari biangi dewa urip,
ia dibu marā woton,
biang i dewane nganggur,
kajanan kumah de rampag,
mamipisin,
tékéd jumah mamulisah.

7. Ngorahang nyakitang basang,
ia kadadak para jani,
bapa ngélur grak géra,
liyu pisagane nulung,
liyu balian tani balian,
padha prāpti,
dapétanga suba péjah.
8. De Rampag ia raris budal,
mangarorod para jani,
bapa enyag buka borbor,
kapéke i dewa énu,
maka dadua nunggu bapa,
ngantung urip,
tangarin dewā pang mélah.
9. Awak cérik tanpa braya,
I Kaki balian tréṣṇain,
ida dong ditu kalodan,
olasin pangayah tuwuh,
tidihin sikép di awak,
nene śakti,
maadan Dewa Sumédang.
10. Bapa bongol tuara bisa,
kewala maan mamunyi,
patawuhang awak kalaran,
anak jani luyuh buruh,
biṣa mangadungang dayā,
ulat kāsih,
basang awake kiruka.
11. Padhabiṣa ngawe daya,
manis manis mamanésin,
palapanin dadi jadma,
éda ngawe péta liyu,
awak kélih nyandang bisa,
téken budhi,
pinéh-pinéhang di awak.
12. Dharmma pasajane tulad,
bhakti ring dewa éda lali,
ngaliyon ngaturang canang,
mabhakti lantast makidung,
sai manyampat di sanggah,
dewa asih,
inilah pūrṇa maka skayā.
13. Yen mangélah pipis patpat,
dadua sépél apang ilid,
adaṣa mangélah jinah,
lalima sépél di bung-bung,
makélo ada antosang,
béliang tapih,
éda goroh budag mangamah.
14. Taine ényen ngawasang,
awake liu mabalih,
kambén uwek pacalompong,
jajitane maingkut,
sédiḥ jéngah bapa mulat,
awak kélih,
palapanin dadi jadma.

15. Plapane buka manégak,
apang endepan agigis,
bas tégeh ban manégak,
yan labuh bawonge élung,
keto dewa ja ingétang
éda ngéngsapin,
sai anggon gagéindingan.
16. éda bogbog mocek péta,
kédeke tuna tunain,
téngét sékénang mapéta,
apang sidhane sumaput,
éda linyok ring braya,
éda jadig,
mararama tulah bannya.
17. Tulah idup jéle pisan,
makélo taénang gudig,
sapari polahé kaon,
dadi bannya mungpung laku,
bérung langu kuat pisan,
nyungsung carik,
jélene ngalih dadalan.
18. Masastra éda gémba-gémbā,
masih sai palajahin,
anggo manyuluhin awak,
ala ayune katépuk,
sakāla niskāla kocap,
pang éda gungguh,
ngangga ngélah kawisayan.
19. éda ngaden awak biša,
dépan anake ngadanin,
gégiṅanne buka nyampat,
anak sai tumbuh luu,
ilang luu buke katah,
yadin ririh,
liu énu pélahang.
20. Ila manyumbungang awak,
kalingke nyai énu cénik,
ada satuannyane suba,
Ida Hyang bhaṭarā wiṣṇu,
sareng Ida Hyang brahmā,
ngaku śakti,
lawut kacépolan linggā.
21. Linggan Ida Hyang śiwā,
manylég tékéd langit,
Hyang Brahmā ngalih ménekan,
Hyang Wiṣṇu mangalih tuun,
kayang jani tuara bakat,
sangkan kari,
toyane ngulah tuunan.
22. Apine ngulah ménekan,
kento satuannyane yukti,
éda nyai sumbar-sumbar,
sukéh ngalih ane patut,
tingkah kalih saang,
mamésélin,
lamun ingane mangabā.

23. Nyai kéliah suba nyandang,
déménin anak muani,
éda kuda cacalodoh ,
manuukin démén kayun,
apang bédik pasélsélang,
téken nyai,
éda ima ngaba awak.
24. Ampahe maphala daduā,
nému jéngah téken māti,
yatnane maphala lasia,
kenjode watusing guyu,
anak jati twara nawang,
munyi manis,
patampagin ban upata.
25. éda mangugu upata,
saja lampah nyane tindih,
pisunane éda ngidhépang,
énto bikas tuara patut,
braya liyu manyélsélang,
to impasin,
puarannya twara mélah.
26. Ngélah pianak dadi péjah,
énu cenik-cenik mati,
ne dumadi tanpa bea,
dadi idup tani mampuh,
bingung punyah mapitungan,
tuyuh sai,
uwuk kowos juna pangan.
27. énto kélidin ingétang,
pédasang pisan ngiwasin,
éda ngulah démén doang,
wékasane masih itung,
palan jélene di awak,
bilih dadi,
ne suba katon impasang.
28. Bapa ngastitiyang awak,
palannyane téken nyai,
bapa mapi manuturang,
dharma patute tuah tiru,
apang adake ingétang,
suluh ati,
kénéhang dharmane saja.
29. Anak liyu ngobah-obah,
tan dadi ban bapa yukti,
dharmane kalahang krodha,
ane pélih dadi patut,
tutur bapane manungkak,
mabar api,
masih panés iyusanya.
30. Bapa tréṣṇa péta doang,
ane puyung katon misi,
ane bédik katon katah,
paling bapa pati kacuh,
sangkan kene tiwas ngurag,
sai-sai,
ngénéhang dharmane jumah.

31. bapa bas titiang tapa,
 palannyane téken nyai,
 bapa mangistiyang dharma,
 patuting sastrane tinut,
 bapa tiwas tuara pada,
 tanpa mélik,
 suka i dewa ngampura.
32. tonden tutug ya mapéta,
 kaget ada ta wong prāpti,
 raraman Wayan Tigaron,
 pésengan I Gédhe Basur,
 bawong mala sada cépag,
 jenggot kumis,
 sélém-sélém mata barak.
33. Natad madhik sému réngas,
 macédes lawut malinggih,
 dayannyane papolosan,
 inyoman karang sumaur,
 beli gédhe uli dija,
 témbe prāpti,
 lawas tong taenmāngguran.
34. I Gédhe Bhasur angucap,
 boman béli tékā mai,
 jati wantah nunas icha,
 makeling treṣṇane dumun,
 béli wantah papatutan,
 téken adi,
 nawi iwang sinampura
35. Béli nunas pūja weda,
 panyupatan manah sédih,
 apan ngrakṣa kanarakan,
 nunas icha kapi lulut,
 sugih wirya anggon doṣa,
 yan tan adi,
 tulus béli kasangśaran.
36. Béli wantah nunas icha,
 pianak adi Ni Śokaśṭi,
 béli ngidih papatutan,
 I Tigaron anggon mantu,
 kanggo adi ngawe wénang,
 éda matari,
 kénéh adine jalanang.
37. Kenken déméne mapianak,
 béli wantah manututin,
 ada kewala nyalanang,
 jumah suba ada liu,
 sikut carane di jaba,
 bécik-bécik,
 béli suba ngélah jumah.
38. I Nyoman karang angucap,
 apa keman tiang béli,
 dépang monto da dawanang,
 apang séngkā raṣa nipun,
 titiang kari mapitungan,
 subajati,
 sadhia tan sadhia dadukā.

39. Tonden tutug makruṇa,
malih wentén ta wong prāpti,
préṇah sāna kadi misan,
mapésengan I Madhe tanu,
marerod ajaka daduā,
ya malinggih,
I Nyoman Karang anyapa.
40. Madhe uli dija busan,
I Made Tanu nyaurin,
beli titiang uli jumah,
nunas icha kapilulut,
I Tirtha ia jumah juang,
ajak dini,
Ni Śokaṣṭi idih titiang.
41. I Tirtha dini panjakang,
ajahin kanggo ja béli,
titiang tiwas tuara bisa,
ngudiang jumah ya mangulgul,
buasan-busan ka bancingah,
génjar-génjir,
tékéd jumah ia macarā.
42. Ni Śokaṣṭi raris ngucap,
kémé bapa enggal mulih,
tunden mai bélin titiang,
nguda jumah ngimut timut,
tunden mai enggal-enggal,
lawut mulih,
tan kocapan tékéd jumah.
43. I Gédhe bhasur ia budal,
mangambul manikul madik,
sarauhe maring umah,
I Tigaron sému guyu,
kenken bapa tunden titiang,
luas mamadik,
raramannya raris ngucap.
44. Wayan bapa suba kéma,
tanpa gawe ngutang munyi,
raramannya suba léga,
dahāne len budhin ipun,
diaép bapa mamésenang,
anak muani,
I Tirtha tagih ajaka.
45. Keto ewer ngawe jéngah,
bapa ngraṣa diati,
éda cai mamangénang,
anak tuara pati sulsul,
gila bapa madingéhang,
banggā munyi,
campah ring wong masewaka,
46. élenan jadi budhiang,
bisa cai manganggurin,
I Tigaron masaur alon,
ménéng bapa bhayatuduh,
titang dadi jadma pāpa,
yan len ngalih,
manah titiang tuara pūrṇa.

47. Yen tan sidha manah titiang,
 mamanjakang Ni Śokaṣṭi,
 titiang maméngatang jiwa,
 satibā paraning laku,
 ngudiang idup ngawe jéngah,
 suka māti,
 wékas malih dadi jadmā.
48. Jadma paran kene sasar,
 sing kénéhang dadi pélih,
 papitu mamadik kado,
 makéjang mangalih angkuh,
 dadi onya tuara nyak,
 awak sugih,
 dana goya sasajayan.
49. Raramane nyaup ngaras,
 duh mās mirah bapane cai.
 sāmpun dewa masélsélan,
 bapa lintang tréṣṇa nyungsi,
 mapianak ring i dewa,
 satya tui,
 bapa wirang matoh jiwa.
50. Ni Śokaṣṭi nora tréṣṇa,
 ngawe wirange tan sipi,
 jani bapa mangwalésang,
 satibā parane gémpung,
 jani bapa mangrusakang,
 yan tan māti,
 nora pūrṇa,manah bapa.
51. Jani suba sandikāla,
 I Gédhe Basur makinkin,
 ka Setra mangaba canang,
 suba ia masanggah cukcuk,
 siap biing banténningnya,
 burat wangi,
 déluange marajah dūrghā.
52. Suba madabdaban goya,
 sami awake nungkalik,
 suba wiṣṇu maring brāhma,
 suba ia masuku telu,
 raris nenggeng magambahan,
 laut nuding,
 layahe néked katangkah.
53. Raris nyumbah midér kiwa,
 mukane rengreng ia kuning,
 buka umah tabuane borbor,
 matate malodlod péluḍ,
 raris nyaluk pitawala,
 anggon kampil,
 makébéér nganggér pédang.
54. Raris mumbul ngawa-ngawang,
 sāmpun amor maring langit,
 kadi jantra murub muncar,
 mai kadandih kébiuh-kébiuh,
 turun jumlah Ni Śokaṣṭia,
 mangulantung,
 dija kane masangladan.

55. Katon umah dadi tégal,
nora tembok tanpa dingding,
tana pangkung nora jurang,
katon asah sinah sāmpun,
Ni Śokaṣṭi kataurag,
péluh pidhit,
gadak uyang buka tiwang.
56. Raramannyane mamantra,
cambra birag Śiwā mrétthi,
bangun nyote ngényit damar,
suluhin pianake layu,
goba kémbang séngal-séngal,
tur ia nyérit,
tulong-tulong magénturan.
57. Pisagane padha prāpta,
luh muani manyagjagin,
padha masundih madamar,
I Tirtha ia sédék ditu,
buka paling ia bélbélan,
sada gipih,
tulong-tulong ratu bapa.
58. Ada nyimbu makpak bawang,
ngupin cungh mangéngkahin,
ngécél batis bahan aon,
ngulig kunyit pamor bubuk,
tamban tiwang kamraṇan,
odak batis,
encuh pisagane tréṣṇā.
59. Ni Rijaśā raris ngucap,
I Kaki Balian ia alih,
gupuh pisagane kémo,
uli jalan gélu-gélu,
kaki jalan te kājanaan,
manélokin,
Ni Śokaṣṭi ia man iwang.
60. Saté kane Kaki Balian,
suba ia matungkéd canging,
suba dabdad uli jumah,
di natahe ya majujuk,
raris maśbda prakāṣa,
ajak mai,
Ni Śokaṣṭi maring natar.
61. éda ngrunjunga Ni Śokaṣṭia,
saru bān kaki ngiwasin,
dini sundang ajak dadua,
pésu adāngan tatélu,
ngalindéng-lindéng di jabā,
ngaba linggis,
pédas-pédasang maliat.
62. Cai Wayan Nyoman padha,
tunjélin api bédangin,
bédauh lan kadia kélod,
gédeyang apanga murub,
kesakit sing nya mélah,
baan kaki,
damare galang-galangang.

63. éda pati ia ngencuhang,
akeh ubad dadi pélih,
lamun Widhi tuara icha,
apin encuh pati képug,
masih tulus banyā péjah,
dayan kaki,
bawang isene uligang.
64. Anggon baboreh da awak,
babakan kelor tému kunci,
ulun atinnyane sémbar,
don balingbing nyuh matunu,
tuéd baong sikut turña,
kapkap masui,
simbuhin apanga ratā.
65. Widubāng luun pabuan,
énto odakang dibatis,
gati-gati manguligang,
apang enggalan katulung,
masui kaki alihang,
suba prāpti,
I Kaki Balian mamantara.
66. sarwa sandi bajrā ngékāra,
Sang Hyang Kul Putih mangaji,
dadukun śaktine māwak,
kasiapa śāmpun tumurun,
tatulak pangraṣa jiwa,
léwih-léwih
Wiśṇu Loka Bhîma Rampag.
67. Śiwa Gaṇā émpu Bahula,
émpu Pradhah panundung deṣṭi,
miwah Hyang Śiwa Sumédang,
panulak kasiapane murub,
Empu minā daśa baywā,
léwih sidhi,
manuṣa śakti manglékas.
68. Ni Śokaṣṭi sāmpun minantran,
babaon tri akṣara luih,
rwa bhineda sāmpun mawak,
tambane suba tatélu,
ényém panés dumalada,
kaatérin,
mréttha sanjiwa Utama.
69. Kalimasada wuspinasang,
Dharma Usadane sandi,
Idér bhuana catur weda,
pancā akṣara tulak bayu,
suba srégép kasūkṣma,
ada malih,
panulak wiṣia marañā.
70. Pamiak kāla bhuta śikṣa,
pamungkém panundung deṣṭi,
bhutā ngrubung durggā ngésah,
kāla grahādewa sapūh,
miwah Sang Hyang Śiwa Sumédang,
durgga luih,
miwah gni pasapatia.

71. Liwat sidhi Kaki Balian,
Ni Śokaṣṭi ia ngalilir,
mangusap-usap wadhana,
warna lumlum kantun acum,
śabdane ngényagang manah,
sadha aris,
Kaki Balian tulung-tulung.
72. Sakit titiang kaprañan,
buka uyup buka upin,
ulun ati mapéptéan,
raris manunggek katundun,
ménéng dewa yata anang,
sara widhi,
kaki tan surud ngitungang.
73. Kipékang ragane dewa,
nunas tundune mantranin,
Ni Śokaṣṭi makipékang,
mantranin pamali tuju,
asakṣaṇa saget ilang,
asing sakit,
pūrṇa mukṣah tanpa matra.
74. Gdhe Bhasur babuan bulangasah,
Idhépniane sayan rimrim,
i balian katon ngancarong,
śakti murub kadi gunung,
malih ada balian tékā,
mabét śakti,
kémuk-kémuk ngaden gampang.
75. Bogbog pétaka tédunan,
tuara nawang angan kliskis,
grak-gérak ampag-ampag,
ségéhin baan nasi bubuk,
kapongor uli di sanggah,
mutang guling,
agéngang tatur bin puan.
76. Ngadu ia tong ségér enggal,
Ni Śokaṣṭi ia nu matali,
kaéjuk ia di pédéman,
gawe dakṣiṇa papitu,
pipis padanya tak ṣolas,
némném kāmbil,
abésik mungguh ka sanggah.
77. Canange malih itungang,
léngé wangi burat wangi,
pélukutus ia gaenang,
pédas ia ségér bin télun,
pipisin padha masolas,
wakṣu śakti,
ngémbus talin Ni Śokaṣṭia.
78. Apan kagunturan lara,
ulat saja malih ayahin,
I Bhasur Icha ningéhang,
balian ladhah pati kacuh,
I Gdhe Bhasur ngaraṣa,
ne takutin,
I Kaki Balian wiśeṣa.

79. Tidong ke bakat éjuk,
 yen ulung tong dadi mélaib,
 awake sayan mangétor,
 lima batis pésu peluh,
 awak lésu sayan baat,
 mélahan mulih,
 malih deṣṭi uli jumah.
80. Alih mai tosing nyandhang,
 I Kaki Balian takutin,
 prabotnyane melagendah,
 ada pasih ada gunung,
 ada api ada alas,
 angin tarik,
 kéna awake tujuna.
81. Yan pakṣa bakal kéma,
 tan urung bungkus matali,
 sangsara kaherang-erang,
 énto baliane ne tédun,
 dhadharin atmāne nujuang,
 békél mulih,
 masariyut nyandér jiwa.
82. Baliane bogig bograris bah,
 lantasi boros ngutah namising,
 cacing tai maadukan,
 séngal-séngal ségu-ségu,
 nemanulung kaden gila,
 bane paling,
 busan-busan maheprokan.
83. Ada ewer malih angucap,
 aba pésu kéma paid,
 singnya sasantune kuang,
 dadi takṣune mangimūr,
 ménék tahun mawiséṣa,
 cabar munyi,
 ulat bolong ban ngatonang.
84. Mamunyi tuara nyangkayang,
 ngorahang takṣu kaśakti,
 kaden saja buka keto,
 kene phalane katépuh,
 nguyak tai atangatah,
 ngulah pipis,
 ngéludin anak kalaran.
85. Masautne sada dégag,
 ajak kumahnyane paid,
 tékéd ditu ia éntungang,
 apang takṣune manulung,
 balian tuara nawang jéngah,
 tuara imbih,
 nguyak tai di piśagā.
86. Ada ngucap papatutan,
 data pétayang tak yukti,
 éntik gumine rawésang,
 ada bénéng ada ngiluk,
 ada corah ada sajà,
 ken tidongin,
 sami dewa mangadakang.

87. Lamun cai padha tréṣṇa,
sakite baréng ayahin,
éne suba paékan lémah,
I Tirta ia suba lésu,
uling tuni ia manyundang,
to salinin,
apang maan madabdaban.
88. pisagane padha tréṣṇa,
gupuh padha mangayahin,
ada manyalin nyundang,
Ni Śokaṣṭi kari lésu,
tumuli raris angucap,
dewa adi,
maike paékin titiang.
89. Ni Rijaṣa mangsékan,
tumuli maśabda aris,
sapunapi jua i dewa,
tégtégang kayun i ratu,
sajine raris ajéngang,
mangde gélis,
émbok mamanggihin kanak.
90. Ni Śokaṣṭi raris angucap,
dong péndahang titiang adi,
tékening i Kaki Balian,
apang titiang énu idup,
ni rijaṣa nyaup ngaras,
titiang ngiring,
titiang méndahang I Dewa.
91. Ni Rijaṣa raris angucap,
apang durus ichan kaki,
madambanin émbok titiang,
yan sih ipun énu idup,
ngayahin dane i bapa,
ngantung urip,
dini jumah ajak titiang.
92. Titiang misadia ngaturang,
sasayut agung asiki,
masarmaya duang lakṣa,
maduluran wastra kampuh,
panganggone arangsukan,
téken kaki,
apang kaki térus ichā.
93. Malih titiang mangayahang,
téken kaki sai-sai,
apang kaki durus ichā,
térusang kaki macucu,
I Kaki Balian angucap,
sāmpun malih,
tréṣṇan kaki toh jîwa.
94. Ni Śokaṣṭi jani kocapan,
makésiar manahe bécik,
panyakite sami ilang,
bāyune suba matuptup,
I Kaki Balian angucap,
dewa gusti,
dini i dewa pang mélah.

95. Kaki ninggalin i dewa,
I Nyoman Karang nyawurin,
Ni Śokaṣṭi ngucap alon,
Ni Rijāṣa ngucap alus,
titiang wantah nunas ichā,
téken kaki,
gawenang sikép di awak.
96. I Kaki Balian angucap,
sandikan inyai gusti,
I Kaki Balian mayoga,
cawét jémak sampun puput,
pangrakṣa jîwa Utama,
nene léwih,
daśa bayu lokanātha.
97. Pancakṣara daśakṣara,
tri ākṣra manyaréngin,
pasurupan rwa bineda,
Ongkāra panukub ipun,
nādha windu Ardha candra,
dadi tunggil,
marāga ring kaki balian.
98. Raris ia kajaya-jaya,
sāmpun ia kapasupati,
nah ne jani dewa anggo,
éda dewa walang kayun,
pamit kakine ring i dewa,
maninggalin,
dini jumah apang mélah.
99. Ni Śokaṣṭi raris ngucap,
mamarga kaki pang bécik,
I Kaki Balian ia budal,
tan kawarṇa polah ipun,
pisagane saréng budal,
padha ngungsi,
sami rauh maring umah.
100. I Gédhe Bhasur ia budal,
arange tan sipi-sipi,
sāmpun rauh maring umah,
bayu runtag pakajutjut,
lésu buka tanpa jîwa,
tanpa galih,
makésiab mirib tugtuga.
101. Sarauhe maring umah,
pédihe tan sipi-sipi,
ngararis ia katuron,
tumuli médhém makabun,
ngarikrikang pandeṣṭian,
yan tan mati,
nora sudha manah nira.
102. Raina tatas séméngan,
I Gédhe Bhasur matangi,
I Tigaron tangis alan,
masawang ia sému sungsut,
raramé raris ngucap,
cai gusti,
suud jani mapangénan.

103. Pinéh-pinéhang di awak,
 di atine sai dhikir,
 titah widhine kanggoang,
 éda manuukin sungsut,
 apan patuduhing dewa,
 to pinéhin,
 sédihe apanga pūrṇā.

104. Bapa tuara manyangkayang,
 mangétohin manah cai,
 apan tong dadi ban bapa,
 masih cai nému racur,
 bapa tua jéngah mulat,
 suka māti,
 wékas malih dadi jadmā.

105. Amonto pitutur bapa,
 raṣa-raṣayang diati,
 I Tigaron lingniā lon,
 ménéng bapā da panjang tutur,
 suba kraṣa antuk titiang.
 pédum kawi,
 ényen anake sélsélang.

106. I Tigaron jani kocap,
 sédihe buka pakeling,
 raris mungguh ka paturon,
 tumuli médém maka bun,
 magaléng-galéng yeh mata,
 sédih king-king,
 ingét dane téken awak.

107. Mangling masasambatan,
 idup luung sapisan māti,
 yan apa dadi manuṣa,
 kene sangsara ia buduh,
 galéngé ia jémak aras,
 papasihin,
 rum-rum ditu di pédéman.

108. I Tigaron tan kocapan,
 satingkahe nyakit ati,
 I Nyoman Karang kocapan,
 suka manahe sagunung,
 Ni Śokaṣṭi suba kenak,
 kadi ngūni,
 raris ngitungang dewaśā.

Puniki gaguritan Bhasur, pécak kakawian I Dalang Tangsub, ring Bongkaśā, wawéngkon Manguni. Puput ring dinā saniscara paing, tanggal 22, budal mei, tahun 1976. Antuk Yayasan Dwijendrā ring Denpasar.